



Igls meis da november e december 2021 ò la suprastanza communal tracto tranter oter igls affars suandonts:

Fatgs generals, fatgs da personal, economia e provedimaint d'energeia

- Decidia d'approvar sainza midadas la posiziun tar la revisiun parziala dalla lescha davart la protecziun dalla nateira e dalla patria digl cantun Grischun.
- Decidia d'inoltrar sainza midadas la posiziun tar la revisiun totala dalla lescha davart la promoziun dalla tgira d'unfants complementara alla famiglia aint igl cantun Grischun.
- Decidia da far la proxima oura da consultaziun per la populaziun dallas vischnancas da Tinizong e Rona igl glindesde, igls 17 da schaner 2022, ainten l'ustareia Scuntrada a Tinizong.
- Decidia da surdar alla PROJEKT.BOX ScRL en mandat d'assistenza an connex cuagl project per ena piazza da tennis e patinera a La Nars.
- Delibero l'invitaziun cun glista da tractandas e messadi per la radunanza communal digls 7 da december 2021.
- Decidia d'alla radunanza communal digls 7 da december 2021 da lascher igl pe da taglia digl cumegn pigl onn 2022 scu anfignen ossa a 100 % dalla taglia cantunala.
- Piglia cunaschientscha dalla survista digls termins pigl onn 2022 per las radunanzas communalas e sedutas da suprastanza.
- Approvo la dumonda dalla cjo SA per ena contribuziun da sustign da 5 % resp. maximal 240'000.- fr, sa basond ad ena somma d'investiziun da 4.8 milliuns francs (incl. la compra digl hotel), cun resalva digl consentimaint dalla radunanza communal.
- Repartia igls departamaints da suprastanza a parteir digl 1-1-2022. An chel connex decidia da desister ad ena roschada digls departamaints e d'agiuntar scu nova incumbensa sen scalem strategic la tematica "digitalisaziun".
- Approvo la cunvignientscha existenta cun ewz per l'ovra idraulica per ava da beber La Niva, Savognin, concernent la furniziun dalla plevalour ecologica anfignen igls 31-12-2025.

Siertad publica e traffic

- Piglia cunaschientscha digl sboz allas explicaziuns digl biro Hartmann & Monsch SA pertutgont igl concept da traffic e parcadi elaboro per Surses. Scu er igl concept per las farmada da posta resp. bus da sport (lescha davart l'equalitad da persungas cun impedimaints).

Fatgs da biagier, planificaziun digl territori e planisaziun locala

- Consentimaint digl project da revitalisaziun dalla Gelgia a Tinizong, er caschuno dalla construcziun dalla rezgia ReSurses tgi pretenda la revitalisaziun da chest tratg.
- Piglia invista dalla documentaziun digl project d'investiziun local da pumpiers e salv polivalent Beiva cun reconstrucziun e reutilisaziun dalla tgesa da scola. Decidia da sottametter igl affar per l'approvaziun e deliberaziun digl credit alla radunanza communal digls 7 da favrer 2022.

Ovras communalas, infrastruttura turistica, economia forestala

- Decidia da renovar igl contract da fittanza per las pastgiras all'Alp Valetta, valevel anfignen igls 2030.
- Piglia invista dallas studias davart la realisabladad digls lis pussebels per en luvratori a Davos Fallung, Savognin, segl areal da Fredy von Büren ainten la zona d'industreia Gravas a Cunter scu er ordvart la seranera.